

Enam syor bagi OIC perjuangankan nasib rakyat Palestin, hentikan kekejaman Israel – Hishammuddin

Astro Awani

16 Mei 2021

Fareez Azman

KUALA LUMPUR: Pertubuhan Kerjasama Islam (OIC) perlu mendesak Majlis Keselamatan Pertubuhan Bangsa-Bangsa Bersatu (UNSC) untuk menghentikan segera tindakan keganasan rejim Israel di bumi Palestin ketika ini, terutamanya di Al-Quds Al-Shareef.

Justeru Menteri Luar, Datuk Seri Hishammuddin Tun Hussein ketika berucap dalam Mesyuarat Tergempar Terbuka Jawatankuasa Eksekutif OIC Peringkat Menteri-Menteri Luar pada Ahad berkata Malaysia mencadangkan enam perkara terhadap pertubuhan itu bagi menekan Majlis Keselamatan PBB agar segera bertindak.

"Pertama, OIC perlu mendesak Majlis Keselamatan Pertubuhan Bangsa-Bangsa Bersatu (UNSC) untuk memperbaiki kegagalannya, dan memikul tanggungjawabnya dalam menjaga keamanan dan keselamatan.

"OIC perlu menekan UNSC untuk bertindak segera, menguatkuasakannya ketetapan dan menegakkan kedaulatan undang-undang. Israel mesti mematuhi sepenuhnya semua kewajibannya seperti yang ditetapkan oleh resolusi UNSC yang relevan, termasuk Resolusi 2334 dan undang-undang antarabangsa, serta Piagam Pertubuhan Bangsa-Bangsa Bersatu," katanya.

Ketika ini jelasnya, dunia kecewa dengan ketidakupayaan Majlis Keselamatan PBB menghentikan segera keganasan Israel terhadap rakyat Palestin.

"Setakat ini, UNSC belum mengeluarkan kenyataan mengenai keadaan semasa di Palestin. UNSC tidak boleh dihalang menjalankan tugasnya terutama berhubung keadaan di Palestin.

"Kedua, dalam memastikan keselamatan saudara-saudara kita di Palestin, OIC perlu mendesak PBB untuk memberikan perlindungan antarabangsa kepada Wilayah Palestin.

"Perlindungan PBB tersebut akan mencegah berlakunya keganasan dan pelanggaran hak asasi manusia di Palestin yang dijajah.

"Seruan untuk perlindungan PBB, selaras dengan undang-undang kemanusiaan antarabangsa, khususnya Konvensyen Geneva, akan memastikan pertanggungjawaban bagi semua pihak dalam konflik ini," katanya lagi.

[TERKINI] Ucapan Menteri Luar Negeri di Mesyuarat OIC berkaitan isu Palestin Perkara ketiga yang disyorkan jelas Hishamuddin, masyarakat antarabangsa khususnya negara anggota OIC harus kuat menggerakkan semua saluran undang-undang, politik dan ekonomi untuk menekan Israel.

"Pada peringkat ini, Malaysia baru-baru ini bekerjasama erat dengan Indonesia dan Brunei bersama-sama mengutuk serangan Israel terhadap rakyat Palestin.

"Perdana Menteri Malaysia (Tan Sri Muhyiddin Yassin), bersama bersama Seri Paduka Baginda Sultan Hassanal Bolkiah dari Negara Brunei Darussalam dan Presiden Joko Widodo dari Indonesia pemimpin lebih dari 250 juta umat Islam di Asia Tenggara bersama-sama akan meminta Israel menghentikan segera pencerobohan di seluruh penjajahan Wilayah Palestin.

"Keempat, negara anggota OIC perlu mendesak masyarakat awam di seluruh dunia menuntut dan menonjolkan pelanggaran terhadap undang-undang antarabangsa, termasuk undang-undang kemanusiaan dan hak asasi manusia antarabangsa, di Wilayah Palestin yang dijajah," katanya lagi.

Ujarnya, peranan masyarakat dunia amat penting dalam memberi tekanan terhadap Israel. Malah Hishamuddin turut memuji secara peribadi usaha rakyat Malaysia tanpa henti mengecam kekejaman terhadap rakyat Palestin secara dalam talian.

"Ini untuk memastikan bahawa penindasan terhadap rakyat Palestin dapat diketahui dan difahami seluruh Malaysia walaupun ada pihak lain melabelkan Palestin sebagai penganas.

"Kelima, masyarakat antarabangsa mesti terus mencari jalan penyelesaian terhadap konflik ini. Kita mesti bertindak segera mengatasi punca konflik dan kembali ke proses perdamaian yang bermakna menamatkan penjajahan Israel," katanya lagi.

Cadangan keenam pula, Malaysia jelas Hishamuddin menekankan betapa pentingnya semua negara anggota OIC untuk terus bersatu membela nasib rakyat Palestin.

"Malaysia menekankan kepentingan semua negara anggota OIC untuk terus bersatu dalam mendokong perjuangan Palestin kerana tanpa perpaduan, Ummah Islam akan terhumban ke arah perpecahan," katanya lagi.

Jelasnya, ketika Malaysia dengan tegas dan secara terbuka menuntut Israel menghentikan keganasan dan serangan ke atas Palestin, masyarakat antarabangsa tidak boleh terus memilih untuk berdiam diri dan tidak menghiraukan kezaliman yang dilakukan Israel.

"Adalah satu penghinaan apabila negara lain bersuara dan bercakap mengenai hak Israel untuk mempertahankan diri dan pada masa sama tiada sebarang suara yang memperjuangkan hak rakyat Palestin untuk mempertahankan diri ketika mereka disembelih atau dijajah lebih 50 tahun," katanya.

Justeru Malaysia tegas Hishamuddin, sentiasa dan secara konsisten mengutuk sekeras-kerasnya pencerobohan dan serangan tentera Israel terhadap rakyat Palestin yang beribadat di Masjidil Aqsa, semua bentuk pengusiran di Sheikh Al-Jarrah serta serangan udara berterusan Zionis di Semenanjung Gaza.

Tegasnya lagi, kezaliman, kekejaman, serangan yang berlebih-lebihan serta melampau Israel jelas mencabuli semua undang-undang antarabangsa malah pelakuan ini melanggar Piagam Pertubuhan Bangsa-Bangsa Bersatu (PBB) serta fasal jenayah perang dalam Konvensyen Geneva Keempat 1949.

**© 2021 Astro AWANI Network Sdn. Bhd.
(535275-D) All Rights Reserved.**

Source: <https://www.astroawani.com/berita-dunia/enam-syor-bagi-oic-perjuangkan-nasib-rakyat-palestin-hentikan-kekejaman-israel-hishammuddin-298278>